

**Tunup sineriaani qilalukkanik qernertanik kisitsinissap piniartunik piffinni  
ilisimasaqarluartunik peqataatitsisup 2022-imi aallartinnissaa pillugu Naalackersuisut  
peqquneqarnissaannik Inatsisartut aalajangiiffigisassatut siunnersuut**  
*Harald Biancomit aamma Knud Mathiassen, Inuit Ataqatigiit, saqqummiunneqartoq*

*aamma*

**Naalackersuisut Nunatta kangiani qilalukkanik qernertanik piniartut ilisimasaannik  
atuilluni kisitseqqissaqqullugit peqquneqarnissaannik inatsisartut  
aalajangiiffigisassaattut siunnersuut. Kisitseqqissaarnek siunissami nunatta kangianut  
pisassiisarnermut tunngaviliissaaq**  
*Lars Poulsen, Siumut, saqqummiunneqartoq*

**pillugit**

**Aalisarnermut, Piniarnermut Nunalerinermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Napaattooq, Naleraq, siulittaasoq  
Inatsisartunut ilaasortaq Aslak W. Jensen, Siumut, siulittaasup tullia  
Inatsisartunut ilaasortaq Hans Aronsen, Inuit Ataqatigiit  
Inatsisartunut ilaasortaq Siverth K. Heilmann, Atassut  
Inatsisartunut ilaasortaq Charlotte Pike, Inuit Ataqatigiit  
Inatsisartunut ilaasortaq Karl Tobiassen, Siumut  
Inatsisartunut ilaasortaq Jens-Frederik Nielsen, Demokraatit

UKA2021-mi ulloq 19. oktober siullermeerinninnerup kingorna ataatsimiititaliap siunnersuut misissorpaa.

## **1. Siunnersuutit imarisaat siunertaallu**

### 1.1. UKA2021/90

Piniartunik piffinni ilisimasaqarluartunik peqataatitsinikkut Tunup sineriaani qilalukkanik qernertanik kisitsinissap 2022-imi aallartinnissaa siunnersuuteqartup kissaatigaa.

### 1.2. UKA2021/97

Piniartut ilisimasaannik atuilluni nunatta kangiani qilalukkanik qernertanik kisitsinissaq siunnersuuteqartup kissaatigaa. Kisitseqqissaarneq siunissami nunatta kangianut pisassiisarnermut tunngaviliissaaq.

## **2. Siunnersuutip Inatsisartunit siullermeerneqarnera**

Aalajangiiffigisassatut siunnersuutit marluusut sukumiisumik oqallisigineqarput. Aalajangiiffigisassatut siunnersuutit marluk tamarmik partiinit tamanit inersuarmit tapersorsorluarneqarput. Tunumi 2022-mi qilalukkanik qernertanik sukumiisumik kisitsinissamut aningaasanut inatsimmi 2022-mi katillugit 3,1 mio. kr.-inik immikkoortitsisoqarnissaa tamanit isumaqatigineqarpoq.

Piniartut ilisimasaat biologit ilisimasaattulli pingaaruteqartigisut oqallinnermi oqaatigineqarpoq. Piniartut ilisimasaasa pingaaruteqarnerat aammalu Tunumi qilalukkanik qernertanik kisitsinissami najukkami piniartut peqataanissaat tamanit isumaqataaffigineqarpoq.

Qilalukkanik qernertanik kisitsinermi najukkami piniartut peqataasalernissaat siunissami piunasaqaatinngorlugu Naalakkersuisut inatsimmik allannguinnissaat oqallinnermi kissaatit saqqummiunneqarpoq. Biologit qilalukkanik qernertanik kisitsinermi pinngitsooratik piniartunik peqataatitsarnissaat pillugu piunasaammik aalajangersaanissaq periarfissaanersoq misissorumallugu Naalakkersuisut oqaatigaat.

Qilalukkanik qernertanik kisitsinermut atatillugu periutsinik assigiinngitsunik atuisinnaaneq siunnersuutini siullermeerinninnermi oqallisigineqarpoq. Periutsit uku taaneqarput: qaammataasat, assilisat aamma dronit kiisalu assersuutigalugu oqarasuaatit angallattakkat appillu atorlugit pisanik nalunaarutiginninnerit.

## **3. Ataatsimiititaliap siunnersuummik suliarinninnera**

Ataatsimiititaliamit erseqqissarumaneqarpoq piniartut inuuneq ilitsoqqussaralugillu nerisat kulturitta ilagimmatigit pingaarutillit aammalu piniartut ilaannut ilaqqat pilersornissaannut

isertitaqaatit pinngitsoorneqarsinnaanngimmata.

Taamaattumillu aalajangiiffigisassat siunnersuutit pineqartut marluk, Tunumi qilalukkat qernertat pillugit kisitsisitigut paasissutissat ilisimasallu nutaat pissarsiarineqarnissaannik qulakkeerinnittussat aammalu Tunumi siunissami qilalukkanik qernertanik pisassiissutinik aalajangersaanissamat tunngaviliisussat, ataatsimiititaliamit assut taparserneqarput.

Qilalukkat qernertat pillugit piniartut misilittagaasa annertuut aammalu ilisimasaasa pingaaruteqartut qitiutinneqarnissaat ataatsimiititaliamit kissaatigineqarpoq. Taamaattumillu qilalukkanik qernertanik kisitsinissani aggersuni piniartut akuutinneqarlutillu peqataatinneqarnissaat aalajangiisuusutut ataatsimiititaliamit isigineqarpoq.

Kiisalu qilalukkanik qernertanik piniagassanillu allanik kisitsinermi piniartut pinngitsooratic peqataatinneqartarnissaasa inatsisini siunissami ilanngullugu allanneqarnissaa Naalakkersuisunit qulakkeerneqassasoq ataatsimiititaliamit kissaatigineqarpoq.

#### **4. Siunnersuutip aningaasaqarnikkut kingunerisassai**

Inatsisartut suleriaasianni § 33, imm. 1-imi allassimavoq aalajangiiffigisassat siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

##### 4.1. UKA2021/90

Tamanna naapertorlugu siunnersuutip piviusunngortinnerani aningaasatigut kingunerisassat siunnersuummi nalunaarneqartut ataatsimiititaliamit maluginiarneqarpoq. Kisitsinerup kingullermik kisitsinermi annertunerusup ingerlanneqarnissaa kissaatigineqarmat kisitsineq 3,4 mio. kr.-it missaannik akeqassasoq missingerneqarpoq.

##### 4.2. UKA2021/97

Tamanna naapertorlugu siunnersuutip piviusunngortinnerani aningaasatigut kingunerisassat siunnersuummi nalunaarneqartut ataatsimiititaliamit maluginiarneqarpoq. Timmisartumit kisitsineq 1,5 aamma 1,7 mio. kr.-it akornanni akeqassasoq missingerneqarpoq. Kingullermik kisitsinermi missingersuutit pillugit § 37 naapertorlugu apeqqummut nr. 105/2021-mut Naalakkersuisut akissutaat tunngavigalugu missingiisoqarpoq.

Tunumi aqutsivinni pingasuni qilalukkanik qernertanik aasakut kisitseqqinneq 3,1 mio. kr.-it atorlugit ingerlanneqarsinnaasoq Naalakkersuisut akissuteqaamminni paasissutissiissutigaat. Naalakkersuisut paasissutissiissutaat ataatsimiititaliamit tunngavissaatinneqarpoq.


**5. Ataatsimiititaliap inassuteqaatai**

UKA2021/90 aamma UKA2021/97 akuerineqassasut ataatsimiititaliap isumaqatigiittup inassutigaa.

Tamatuma peqatigisaanik ataatsimiititaliap isumaqatigiittup Naalackersuisunut kaammattuutigaa:


- Periutsit qanoq ittut qilalukkanik qernertanik kisitsinissami aggersumi atorneqartussatut Naalackersuisunit naatsorsuutigineqarnersut aappassaaneerinninnermut atatillugu ataatsimiititaliamut paasissutissiissutigeqqullugu
- Tunumi 2022-mi qilalukkanik qernertanik kisitsinissamut 2022-mi aningaasanut inatsimmi 3,1 mio. kr.-mik immikkoortitsisoqarnissaa
- Tunumi qilalukkanik qernertanik kisitsinissani aggersuni piniartut peqataatinneqarnissaat qulakkeerneqassasoq
- Qilalukkanik qernertanik piniagassanillu allanik kisitsinermi piniartut siunissami pinngitsooratik peqataatinneqarnissaannik qulakkeerinnittumik inatsisit allanngortinneqarnissaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



---

Jens Napaattoq  
Siulittaasoq




---

Aslak W. Jensen  
Siulittaasup tullia



---

Hans Aronsen




---

Siverth K. Heilmann



---

Charlotte Pike



---

Karl Tobiassen



---

Jens-Frederik Nielsen